

Njuolggadusat Sámiráđi searvamii dutkanprošeavttaide

Dáid njuolggadusaid ulbmilin lea nannet Sámiráđi ja akademiija ovttasbarggu seammás go dat galget suodjalit sámi beroštumiid ja vuoruhuvvon dutkansurggiid. Ulbmil lea sihkkarastit árvvolaš ja vuoiggalaš oktavuoda gaskal sámi oasálastiid ja dutkanásahusaid. Juohke dutkanprošeakta mas Sámiráđđi lea mielde, galggašii addit lassiarvvu buot oasálaččaide.

1. Árra searvan prošeaktahábmemii

Sámiráđđi berre leat mielde prošeavttaid hábmemis árrat juo. Dát guoská maiddá dutkanulbmiliid ja metodaidd hábmemis.

2. Vuoruhuvvon dutkansuorggit

Dutkanprošeavttat main Sámiráđđi lea mielde berrejit deattuhit ja ollašuhttit ráđi vuoruhuvvon dutkansurggiid, nugo giella, kultuvra, vuoigatvuođat, dearvvašvuohta ja biras.

3. Ehtalaš njuolggadusat

Dutkanprošeavttat main Sámiráđđi lea mielde berrejit čuovvut dohkkehuvvon ehtalaš njuolggadusaid dutkama várás eamiálbmotoktavuođain. Dasa gullá gullá friddja, ovddalgihtii ja dieđiheami vuođul miehtan, kultuvrralaš sensitivitehta ja vuoigŋalaš vuoigatvuođaid suodjaleapmi.

4. Oamasteapmi ja beassanlohpi dieđuide

Sámiráđđi berre oažžut beassanlobi ja vejolašvuođa oamastit sihke dataid ja bohtosiid daid dutkanprošeavttain main sii leat mielde.

5. Vuodđomáhttu sámi kultuvrra ja servodaga birra

Dutkiin geat háliidit ovttasbargat Sámiráđiin, ferte leat vuodđoipmárdus sámi kultuvrras, servodagas ja vejolaš erenoamáš beliin mat gusket sin dihto dutkansuorgái.

6. Gulahallan ja ulbmillaš ovttasdoaibman

Dutkanprošeavttat galget láchit dili ulbmillaš gulahallamii ja vuorrováikkuhussii gaskal árbediehtiid ja akademihkkariid, ja sihkkarastit ahte goappašat bealit ipmirdit guhtet guimmiideaset perspektiivvaid ja terminologijja.

Berre várret áiggi ja resurssaid prošeaktabušehtas doarjut dán gulahallama doarvái buriid jorgalanbálvalusaiguin.

7. Gelbbolašvuođahuksen ja máhttolonohallan

Dutkanprošeavttat main Sámiráđđi lea mielde berrejit láhčit dili gelbbolašvuodahuksemii ja máhtolašvuoda lonohallamii gaskal ráđi ja dutkanásahusaid, dás maiddái oahpahus, bargobájit ja seminárat.

8. Gulahallan ja gaskkusteapmi

Bohtosat dutkanprošeavttain main Sámiráđđi lea mielde berrejit gaskkustuvvot dakkár vugiin mii lea olámuttos sámi servodahkii ja mearrideaddjiide áddehahtti vuogi mielde.

Dutkanásahusat ja Sámiráđđi berrejit ovttrasráđiid ovddidit gaskkustanstrategiijaid mat fátmastit iešguđet mediaid ja formáhtaid, nu go artihkkaliid, raporttaid, ovdanbuktimiid ja digitála vuogádagaid.

9. Guhkesáiggi ovttasbargu ja searvevuolta

Sámiráđđi ja dutkanásahusat berrejit bargat ásahit guhkesáigásaš ovttasbarggu ja oasálašvuoda sihkkarastin dihtii bistevašvuoda ja ceavzilvuoda dutkanprošeavttain mat gieđahallet sámi beroštumiid ja vuoruhemiid.

Dasa sáhtta gullat ovddidit oktasaš dutkanstrategiijaid, ovttasbargošiehtadusat ja ruhtadanortnegat mat dorjot sámi dutkanvuoruhemiid.

10. Ekonomalaš resurssat

Dutkanprošeavttaid bušeahtas berre leat sierra oassi sámi oassálastiide ja Sámiráđđái, mii gokčá goluid mátkkiide, dulkomii, oahpahussii, bargoáigái ja eará maid ráđđi dárbbasa prošeavtta searvama olis.

Prošeaktabušeahtas berrejit leat ruđat árrat searvvahit sámi berošteddjiid prošeaktahábmemei, vai sámi beroštumit ja vuoruheamit árvvoštallojuvvojit.

Overhead: Prošeavttain berre leat overhead-mearri Sámiráđđái mii vástida ráđi resursadárbbu ja dasa man olu návccaid bidjá prošeaktii. Overheada mearri lea gaskal 30-40% bušeahttaoasis mii lea bajábealde namuhuvvon. Dat speadjalastá Norgga, Ruota ja Suoma dutkanásahusaid overheadmeriid. Overhead gokčá bajildusgoluid mat čatnasit hálddašeapmái, oktavuotahuksemii ja prošeaktadoarjagii. Dárkilis proseantaoassi berre šiehtaduvvot ja muddejuvvot prošeavtta viidodaga, guhkkodaga ja mohkkáivuoda vuodul.

11. Árvvoštallan ja čuovvoleapmi

Sámiráđis berre leat vejolašvuolta árvvoštallat ja addit máhcahagaid dutkanprošeavttaide maidda sii servet, ja máhcahagaid berre árvvoštallat vejolaš čuovvolanprošeavttain.

Dáid njuolggadusaid čuovvuma bokte sáhttet Sámiráđđi ja akademii ja nannet ovttasbargguset ja sihkkarastit ahte dutkanprošeavttat šaddet eambbo searvadahtti, relevánta ja ahte dat árvvusatnet sámi beroštumiid ja vuoruhemiid. Dát mielddisbuktá maiddái ulbmillaš gulahallama ja ovttasdoaimmama gaskal árbediehtiid ja akademiikkariid, ja láhčá vuodu guhkesáiggi ovttasbargui ja searvevuhtii.